



9. september 2022

UKA2022/178

Inatsisartut Suleriaasianni § 36 malillugu apeqquteqaat aallaavigalugu oqallinnissamik imaattumik siunnersuuteqarpunga:

Qanoq iliorluni suliffeqarfiit namminersorlutik oqartussat tamakkiisumik ilaannakortumilluunniit pigisaat allagaatinik takunnissinnaatitaaneq aqqutigalugu paasissutissanik aallerfigineqarsinnaanngorlugit, Pisortat ingerlatsinerat pillugu Inatsisartut inatsisaat nr. 9, 13. juni 1994-imeersup malitsigisaanik nalunaarutip nr. 78, 30. december 2021-meersup ilaneqarsinnaanera pillugu apeqquteqaat aallaavigalugu oqallisissiaq.

(Inatsisartunut ilaasortaq Doris J. Jensen, Siumut)

Tungavilersuut:

Oqartoqartarpoq ingerlatseqatigiiffiit A/S-nik taaneqartartut inuiaqatigiit pigisarigaat. Tamanna soorunami ilumoorpoq. Tamatumalu malitsigissavaa, suliffeqarfiit pisortat ingerlataat allat assigalugit paasissutissanik inuiaqatigiinnut – piginnittunut – tunniussisarnissaminnik pisussaaffeqassammata.

Allagaatinik takunnissinnaatitaaneq aqqutigalugu paasissutissanik ujartuinermi soorunami tamanna ujartuisumit tungavilersorneqartussaavoq, tassami ulluinnarni ingerlatsineq toqqaannartumik akuleruffiginissaa minnerunngitsumillu unammilleqatigiinnissaq eqqarsaatigalugu mianerisassanik peqartoqarsinnaasarmat. Kisianni tamakku uniffiginagit, assersuutigalugu inatsisartut kukkunersiunermit ataatsimiisitaliaat, kommunalbestyrelsi, innuttaasut tusagassiortullu paasissutissanik pingaarutilinnik tunineqartussaataanerit ersarissarneqartariaqalersoq Siumut isumaqarpoq.

Inatsisartunut kommuninullu qineqqusaarnermi kingullermi, innuttaasunut Siumup oqariartuutigaa qineqqusaarutigalugulu, ammasumik ingerlatsilernissaq. Taamaattumik oqaluinnarani tamatuma qulakkeernissaa piffissanngorpoq, inuiaqatigiinni ammanerusumik ingerlatsinissaq qulakkeerniarlugu. Inatsisit aporfilersuisut aaqqiiviginissaat pisariaqarluinnarpoq.

Allagaatinik takunnissinnaatitaaneq pillugu inatsit tassaavoq innuttaasunut, tusagassiuutinut inuussutissarsiortunullu suna arlaat tungavigalugu tamanut soqutiginaateqarsinnaasut qulaajarneqarnissaanut periarfissiisoq. Nunarput nunanut allanut sanilliullugu annertunerungaartumik pisortat ingerlatsivigivaat, aamma suliffeqarfiit aktianik piginneqatigiiffittut ilusillit pisortat ingerlataat eqqarsaatigalugit.

Pisortat ingerlatsiviini ammasumik periuseqarnissaq qulakkeerniarlugu, allagaatinik takunnissinnaatitaaneq pillugu inatsit aalajangersakkallu tassunga attuumassutillit



ersarissarneqartariaqarput. Taamaalliluta tamatta periarfissinneqassaagut ilisimalissallugu, pisortat siunnersuusiornerminni suna siunertaralugu suliaqarsimanersut, aamma ulluinnarni ingerlatsinermi aningaasartuutsit uatsinnut toqqaannaq sunniuteqartartut qanoq inissisimatinneqarnersut. Minnerunngitsumik, pingaarnertullu, atorfirmut atatillugu ileqqorlussinnaanerit pinngitsoortinniarnissaanut inuiaqatigiittut sakkussaqaernerulernissarput nalunaarutip pineqartup annertusineratigut aqutissiuussinnaassavarput.

Namminersorlutik Oqartussat nalunaarutaanni nr. 78, 30. december 2021-meersumi¹ INI A/S allagaatinik takunnissinnaatitaanermut ilanngutitinneqarsimavoq. Nalunaarullu taanna annertusineqartariaqarpoq, taamaasilluta suliffeqarfiit pisortanit piginneqataaffigineqartut aalajangiisumilluunniit sunniuteqarfigineqarsinnaasut, inuiaqatigiinnit qanimut malinnaavigineqarsinnaanngortissagatsigit.

Aktianik piginneqatigiit, Naalakkersuisut aamma kommunalbestyrelsip aalajangiisumik sunniuteqarfigisinnaasaanni aamma suliffeqarfiit kisermaassisussaataaeramik tunineqarsimasut, paasitinneqarsinnaatitaaneq pillugu inatsimmut ilanngutitinneqartariaqarput.

Pineqartorlu killeqartariaqartoq siunnersuuteqartut ilisimavaat. Taamaattumik nalunaarutip annertusinnissaanut killigitinneqartussat marluussasut takorloopavut; Suliffeqarfiit pisortat pigisaat pineqartut tassaassasut Naalakkersuisut aalajangersaallutik sunniuteqarfigisinnaasaat, aktianillu minnerpaamik 50 procentimik piginneqataaffigisaat aamma suliffeqarfiit kisermaassisussaataaeramik pisinnaatitinneqarsimasut. Unammillerneq eqqarsaatigalugu suliffeqarfiit annermik nunanut allanut niuerneramik ingerlatallit aalajangersaanermit mininneqarsinnaapput.

Taamak Siumumit oqaaseqarluta oqaluuserisassaq Inatsisartunut tunniupparput, neriulluta inuiaqatigiit ammanerusumik ingerlanneqalernissaanut Inatsisartunut ilaasortat akornanni amerlanerussuteqartoqassasoq.

¹ https://inatsisit.gl/Lov?rid=%7b290AFD89-E992-41CB-AD11-4012268B5424%7d&sc_lang=kl-GL